

01/05/1999

Dr Mahathir bidas kerakusan Eropah

KUALA LUMPUR, Jumaat - Datuk Seri Dr Mahathir Mohamad gemar berterus terang.

Ini jelas dibuktikan dalam buku yang bakal diterbitkan berjudul A New Deal For Asia (Pelanduk Publications) yang menghuraikan rasa kecewanya terhadap kerakusan pedagang mata wang yang memporak-perandakan ekonomi Asia pada 1997 dan 1998.

Buku itu memaparkan isi hati seorang tokoh dunia dan pemikir ulung yang mengulas mengenai pelbagai isu kontemporari dengan jelas.

Mereka yang menerima kata-kata tajam dan kritik analisis dalam buku yang mudah dibaca ini mungkin berasa peritnya. Pengkritik beliau mungkin tidak setuju dengan telahannya mengenai punca krisis itu.

Memang sukar menolak ketajaman dan analisis beliau mengenai isu berbangkit dan bagaimana ia berlaku.

Mengulas belunggu terbesar ekonomi abad ke-20, Dr Mahathir menulis daripada perspektif sebagai saksi terdekat mengenai gelombang yang melanda rantau ini.

Sambil memberikan pendapatnya tentang cara mana Asia harus bangkit daripada debu kemusnahan krisis kewangan, Dr Mahathir turut berkongsi pandangan bagaimana Asia memacu keluar ke arah kemakmuran, siapa yang memusnahkan impian Asia, nilai Asia dalam dunia yang bergelora, peranan Jepun dalam memulihkan Asia dan cara berhadapan dengan cabaran alaf baru.

Dalam buku itu, beliau melepaskan rasa marahnya terhadap mereka yang melambatkan langkah Malaysia ke arah menjadi negara maju seperti yang digariskan dalam Wawasan 2020.

Dr Mahathir yang tidak suka berdolak dalik, turut menumpukan sebahagian besar bukunya mengenai ciri Eropah yang disifatkannya sebagai suka berperang dan cenderung memiliki kebendaan.

"Tidak satu tahun yang berlalu dalam sejarah mereka bila mereka tidak berperang, tidak bertelagah. Keamanan tidak bermakna tidak bergaduh, hanya tidak berlaku perang rasmi. Dan pada masa ini mereka sekali lagi menambah perbelanjaan untuk meningkatkan keupayaan peperangan semata-mata untuk menyediakan diri dan menggerunkan pihak lain," katanya.

Beliau berkata, sekali sekala Eropah akan melontar bom dan peluru berpandu untuk memuaskan naluri perang mereka.

"Nilai peradaban mereka ini mendorong mereka untuk membangunkan peralatan perang yang canggih, lengkap dengan senjata yang boleh membunuh. Dengan peningkatan peralatan secara berterusan, mereka berperang sesama sendiri dan dengan orang lain di mana-mana saja," katanya.

Dr Mahathir berkata oleh itu sejarah mereka adalah berperang tanpa ada kesudahan, setiap kali lebih ganas dan menyebabkan lebih banyak kemusnahan daripada sebelumnya.

"Malah, sebelum mereka menamatkan satu perang, mereka sudah bersedia untuk perang seterusnya dengan alasan "untuk mencapai keamanan, kita mesti bersedia untuk berperang," katanya.

Peralatan perang mereka diangkut melintasi lautan untuk berperang berat sebelah dengan penduduk negara yang tidak suka berperang seperti di Asia, Afrika dan negara-negara benua Amerika, kata Dr Mahathir.

"Hak rakyat negara langsung tidak dipedulikan walaupun mereka ini mendiami kawasan ini berkurun sebelum orang Eropah datang.

"Kepada orang Eropah, setiap tanah yang mereka nampak dianggap sebagai yang baru dan boleh diduduki. Malah mereka mencetuskan idea yang mereka

dihantar oleh Tuhan untuk membawa peradaban kepada penduduk asal yang dianggap orang tidak beradab," katanya.

(END)